

La Quotidiana 10-5-2016, p. 2

«Guerra sontga» en Europa

■ (gs) Ils attentats terroristics dals 11 da settember 2001 (2996 unfrendas) mun-tavan ina vieuta da l'istorgia globala. Quels da Madrid ils 11 da mars 2004 han fatg 191 morts. Quels da Paris l'onn passà han confirmà ch'il terrorissem basà sin in'interpretaziun extrema da l'islam po furiar nua ch'el vul e po. Lur auturs vivevan cunzunt en Belgia e Frantscha. Politologs e sociologs perscruteschan motivs e furmas da lez terrorissem ch'i numnan «dschihadissem», segund il pled arab «dschihad» ch'ins po translatar cun «guerra sontga». I n'èn betg adina d'accord tranter pèr. In d'els, Gilles Kepel (*1955 a Paris), arabist da derivanza tscheca, docent a l'Institut da ciencias politicas (Paris) davart il Proxim Orient e las rivas da la Mar Mediterrana, ha scrit plis cudeschs davart las societads islamicas en Orient ed en las aglomeraziuns franzosas. El ha gist publictà «Terreur sur l'hexagone. 2005–2015, genèse du djihad français» (Gallimard, Paris).

Il «Schweizerisches Institut für Auslandsforschung» (Universitad da Turitg; www.siaf.ch) arranscha in referat da Kepel per englais mesemna, ils 18 da matg a las 18.30 en l'aula, Rämistr. 71, KOL-G-201. Il titel tuna: «Djihad in Europe».